

佩漢印綬凡三百七十六人而康居大月氏安息罽賓
烏弋之屬皆以絕遠不在數中其來貢獻則相與報不
督錄總領也

贊曰孝武之世圖制匈奴患其兼從西國結黨南羌師古

曰圖謀也從音子容反迺表河曲列西郡○宋祁曰新本西作四開玉門通

西域以斷匈奴右臂隔絕南羌月氏單于失援由是遠

遁而幕南無王庭遭值文景玄默養民五世天下殷富

財力有餘士馬彊盛故能睹犀布瑇瑁則建珠崖七郡

師古曰瑇瑁音代瑁音妹感枸醬竹杖則開牂柯越嶲師古曰枸音矩聞天

馬蒲陶則通大宛安息自是之後明珠文甲通犀翠羽